

P R E F A C E .

donné argument à ce grand poete *Hömere*, de tant vertueusement celebrer par ses escrits *Vlysses*, sinon ceste longue peregrination, & loingtain discours, qu'il a fait en diuers lieux, avec l'experience de plusieurs choses, tât par eau que par terre, apres le sacagemēt de *Troie*? Qui a esté occasion à *Virgile* de tât louablemēt escrire le *Troien Enee* (combien que, selon aucuns *Historiographes*, il eust malheureusemēt liuré son propre país es mains de ses ennemis) sinō pour auoir vertueusement resisté à la fureur des vndes impetueuses, & autres incōueniens de la marine, il y ait veu & experimēté plusieurs choses, & finablemēt paruenir en *Italie*? Or tout ainsi que le souuerain Createur a composé l'hōme de deux essences totalement differentes, l'une elementaire & corruptible, l'autre celeste, diuine, & immortelle : aussi a il remis toutes choses contenuës sous le caue du ciel en la puissance de l'homme pour son vsage : dessus, à fin d'en congnoistre autant qu'il luy estoit necessaire, pour paruenir à ce souuerain bien: luy laissant toutefois quelque difficulté, & varieté d'exercice: autrement se fust abastardi par vne oisueté & nōchallance. L'homme donc biē qu'il soit creature merueilleusemēt bien accōplie, si n'est il neātmoins qu'organe des actes vertueux, desquelz Dieu est la premiere cause: de facon qu'il peut eslire tel instrument qu'il luy plaist, pour executer son dessein, soit par mer ou par terre. Mais il se peut faire, comme lon voit le plus souuēt aduenir, que quelques vns sous ce pretexte, facent coustume d'en abuser : Le negociateur pour vne auarice & appetit insatiable de quelque biē particulier & temporel, se hazardant indiscretemēt, est autāt vituperable, ainsi que trefbiē le reprēd *Horace* en ses *Epistres*, cōme celuy est louable, qui pour l'embellissement & illustration de son esprit, & en faueur du bien public, s'expose libremēt à toute difficulté. Ceste methode a bien sceu pratiquer le sage *Socrates*, & apres luy *Platon* son disciple, lesquels non seulemēt ont esté contens d'auoir voyagé en país estranges, pour